

## LA SOVRANITÂT NAZIONÂL ...USANCE LÔR!

Al è biel lei, in chestis setemanis, i sfueis o rivistis talianis che a vadin par grant, indulà che a strucjin ingjstri e sapience lis personalitâts plui innomenadis: ex sorestants di ministeris, ex presidents dal Consei e vie indenant. Sfueis, par solit, di oposizion indipendente: liberai, neofassiscj, framassons dal defont partît di azion...

Chescj omenons, o che a critichin o che a laudin il guvier, e sore di dut a dan conseis di politiche foreste e militâr, sul cont des intrigadoriis dal moment neri che si sta passant. Ducj a partissin di une suposizion: che il guvier talian di vuê - come chel francês o cualsei altri guvier de Europe - a vebin autoritât o libertât o fuarce di pesâ pôc o trop sul destin dai lôr popui e dal continent intîr: che a vebin, in sumis, une sovranitât nazionâl di podê fâle valê su lis decisions de politiche internazionâl.

Ce sovranitât? Biade int, che e à pôre dal decentrament regionâl che al limitarès la sovranitât di Rome, e no si è in mò visade che dutis lis sovranitâts nazionâls europeanis a son ladis a fâsi benedî daspò che, pe incapacitât di sovrans o di sorestants, si è vignude a creâ cheste situazion! Cumò i sovrans vêrs a son in doi: un di ca e un di là, e noaltris tal mieç, dividûts in dôs ubidiencis, o a chel di soreli a mont o a chel di soreli jevât.

Alì ve che a viodin e che a pensin i dordei nazionaliscj nostrans di dutis lis tintis e gradazions, che nus fasin la vuere pal nestri spirt furlanist e cuintrinazionalist: indulà che si trate di cjossis di cualchi impuartance, il mont nol è plui dividût in nazions; al è dividût, di insom e fin da pît, in partîts e governât da interès di partît o de pôre che a àn un dal altri i caporions dai partîts. Altri che lis menadis de granitiche unitât, la opare di unificazion dal Risorziment, il primât dal popul talian in dut il mont, e lis acuilis e lis lovis e "le colonne, i simulacri e le erme torri degli avi nostri" e dut l'armamentari des bufulis archeologjichis che nus butin in muse ogni volte che si domande di jessi almancul un freghenin parons a cjase nestre!

E cheste, par intant, e je dome une cercje: il biel al vignarà plui indenant, se lis cjossis a van par chê strade che a son inviadis. In chê volte i nestris pampagai dal "prestigio" nazionâl a laran a butâ sul taulin de politiche mondiâl acuilis e lovis e vueris di independence: si visaran cetant che a pesin! Si visaran ce che e zove la unitât granitiche de nazon, ce che e sarà buine di fâ la

pestilence de camore burocratiche mantignude, cjarinade, sglonfade in non de grandece nazionâl!

E par intant che si teginin inte sachete, in cjalt, i lôr conseis e sugjeriments, parcè che il guvier, ancje se al volès, nol podarès plui lâ daûr di lôr ... Nol è lui che al comande.

josef marchet - Patrie dal Friûl / Avost 1950